

Fecha ta yegando; bo tin bo carchi pa Vale caba?



ORANJESTAD – Dianan ta pasando y pronto Aruba lo tin oportunidad di wak su comico mas stima, Vale Croes, bek riba escenario. Dianan 1, 2, 3 y 4 di september proximo, e gran humorista lo ta presentando su produccion mas nobo yama 'Bahando cu Penshon' den Renaissance Convention Center. Y di berdad Vale ta bandonando su bida den farandula pa enfoca riba su salud y tambe ta pasa a

batuta na un sucesor mas hoben pa sigui laga Aruba hari sin fin.

Pa celebra carera di un bida largo den teatro, musica, humor, y trabou 'serio', no por keda sin haci mencion di un biografia resumi di e Arubiano aki cu sigur a acumula hopi cos pa conta y pa hari den dje den su experiencianan. Vale Croes a nace dia 5 di November di año 1951 y a biba te cu su 22 año na Pos Chikito. Vale



a studia na Savaneta kleuter, na Sint Antonius School Savaneta y tambe a forma parti di koor Sagrado Curason, misa caminda tambe tabata misdienaar. Na scol mes Vale a presenta su prome comedia cu tabata consisti di algun sketch chikito y na 1961 el a actua den prome obra grandi di teatro cu Rapid Club. Vale a sigui cu su razonan di haci pret na scol cu e muchanan, cu juffrouw, meneernan y frérenan y asina e fama di mucha pret a nace. Na 1966 Vale a caba scol basico y a bay Martin Luther Kingschool pa siña carpinteria. E mesun año el a cuminsa canta cu Mariachi Perla di Aruba bou direccion di Sr. Esi Croes e tempo ey y tambe a biaha pa Corsou y Boneiro pa presenta. Su prome trabou, na 1969 tabata na Bosch Plastics ganando 1 florin pa ora. Na 1971 el a bay Hulanda pa siña traha cu Fiberglass pa un año y na '73 el a drenta den e banda musical Sensacion del Caribe y despues asina den diferente otro bandanan y mariachi. Pa conta chiste mes, el a presenta un show pa prome biaha na Club Connie Francis na 1973 y e acogida tabata asina grandi cu na 1974 el a sali Pancho di Coriente hunto cu Robby Jansen como Prins Lenga. Vale a sigui canta cu Sensacion del Caribe

te na año 1980. Na 1979 el a sali Prins der Prinsen. Na 1980 el a cuminsa traha den gobierno y na 1981 el a cuminsa cu show den Cas di Cultura te cu dia di awe, mayoria di nos por corda. Nan 2001 y 2009 a tuma break na Aruba pero Corsou, Boneiro, Sint Maarten y Hulanda si no por a haya suficiente di Vale y el a sigui haci show. Na 2004 Vale y Robby Jansen a bolbe conquista e titulo di Prins der Prinsen. Remarcabel ta cu Vale ta e unico comico di Aruba y awor e ta entrenando un mucha homber cu pronto lo tuma e rienda di su shownan. Na november di e año aki Vale ta cumpli e bunita edad di 60 año. Na Corsou y Aruba Vale ta invicto den su comidad. Te ainda no tin niun hende pa gane den comidad. Vale ta nos artista number uno den comidad y orguyo di Aruba. Unda cu e bay e ta laga un stempel graba den curason di su fiel siguidonan y nomber di Aruba den laira aya. Manera a comenta, e año aki Vale ta bay cu penshon y kier pidi pueblo di Aruba pa apoya su show. Entrada pa e show 'Bahando cu Penshon' ta obtenibel na diferente cerca di bo manera Valero Palm Beach, Gallo Rojo na San Nicolas, CD's More, Manuelito's Sports Bar y Welcome Snack. □